



Selasa, 07 Mei 2024

Ogen: 2 Korinti 4:16



Tep-tep Wari Ipelimbarui



Nai kalak erdakan alu kudin. Bahan bakarna ranting kayu ntah pe kompor si erbahanca mbiring pantil kudin e. Guna mbersihkan kudin e orang-orang tuanta megati make pasir ntah pe abu gosok. Si menarik reh rusurna kudin e ipake reh jilena pertasak nakan, janah reh rusurna igus-gus reh mejelisna kudin e dengen murah mbersihkenca. Kegeluhen kalak si tek man Tuhan arusna bagi kudin e. Ipelimbarui teptep wari la erbahanca kita gentar tapi erbahanca reh mersikna kiniteken bage pe reh terujina biak si mehuli i bas geluhta.

Paulus ermengkah ate i bas geluhna, sabap teptep wari ia nggejabken ipelimbarui Tuhan. Alu kai nge ia ipelimbarui? Arah kiniseran dengen perbeben. Secara realistis Paulus sedar maka reh tuana daging pasti reh burukna. Tapi kegeluhen manusia labo kap terjeng daging kula saja. Manusia lit pertendinna. Pertendin e rehna i bas Tuhan nari. E maka rembak ras Tuhan mahanca tendita la muas dengen melehe. Dat pemere, seh sura-sura, jadi bagi ateta banci erbahanca meriah ukur, dengen meriah tendita. Tapi si e kerina sementara ngenca ngaruhna i bas geluhta. Megati pe ban si e lupa kita, situndalken Dibata. Pengalaman Rasul Paulus, kiniseran si inanamina i bas mberitakan Berita Si Meriah, erbahanca reh rembakna ia ras Tuhan. I bas kiniseran sialokenna bas doni nari, igejabkenna pengapul, pergegeh, kuasa si rehna i bas Tuhan. Em si teptep wari igejabkenna, erbahanca mbaru lalap pengarapen ras keriahen e i bas pertendinna.

Ula erleja-leja ngendesken geluhta man Tuhan, gia tambah wari tambah kelemahenta. Ula mbiar ngalaken perbeben, ula sangsi gia kulanta reh burukna. Sabap kalak si erkiniseran erkiteken Tuhan, janah tetap ernalem baNa, ia labo reh tuana tapi reh bijakna.